

No reira e hoa ma e titiro mai ki enei taonga a o koutou tupuna.

Kaati me whakaatu atu au i te utu mo konei. Mo te noho o te tamaiti tekau pauna mo te tau, e rua pauna mo te horoinga kakahu me etahi herengi mo nga raruraru noa iho o te tamaiti. Heoi ano nga raruraru.

Ko te waahi e tu ana te kura he waahi pai mo te ora o nga tamariki. E rua nga kooti tenehi, me tetahi waahi purei hooki, otira he waahi motuhake mo nga tini takaro a nga tamariki. Tokotoru nga kai-whakaako me taku hoa-wahine hoki hei whaea tiaki i nga tamariki noho i roto i te Kareti. Heoi mo tena.

Na me ata whakaaro e tatou etahi ahuatanga o nga kura penei a me pehea hoki e piki ai te pai mo te Iwi Maori. E ki ana etahi ma te matauranga, me etahi ma te mahi. He pai ra hoki era engari ko tetahi mea i mahue ara te whiriwhiri a te tangata i te pai i te kino kei meinga to tatou matauranga, mahi ranei hei kino. Ahakoa te maha o nga kura e kore e nohoia e nga tamariki, kei te mau tonu te korero a nga kaumatua me nga kuia "Korerotia atu tenei, mea te tamaiti kaore e whakarongo." Kaore te matauranga te mahi hoki e kaha ki te whakarata i te hinengaro tikaka o te tangata. Ma te whakapono anake tena me te aroha noa o Ihu Karaiti. No reira e tika ana kia mohio nga tamariki ki te ora, ki nga mahi, ki nga korero hoki a te Karaiti. Koinaka tetahi mahi a nga kura mihingare.

Tuarua, ko nga kai-whakaako kura hei matua mo nga tamariki engari he matua mohio taunga hoki ki te tiaki tamariki. I ki ra te Keneturio ki a te Karaiti "Ko au he tangata e whakahaua ana a he hoia hoki aku hei whakahau maku. Ka mea atu au ki tetahi haere a ka haere, ki tetahi haere mai a ka haere mai. ki taku pononga ranei meatia tenei a ka meatia e ia." He pera hoki nga kai-whakaako i a ratou akoako—a ma te pai o te whakahaere a nga tamariki e mohiotia ai e te tangata he tamariki Kareti. Na te Pihopa o Aotearoa tetahi o nga tamariki kei konei, a ki te ki a te Pihopa kia Ngati-Raukawa he kura tino pai tenei.

Mo te taha ki te whakaako: Ko te tino mea, kia tino mohiotia te reo Pakeha ko tena te tino taonga e taea ai te whawha te hohonutanga o te matauranga o te ao-pakeha. Ma taua reo ka huakina ai nga tatau o nga whare wananga a te Pakeha. Kua tapiritia hoki era atu akoranga e tika ana mo nga whakamatautauranga a te Kawanatanga hei uru ma te tamaiti ki te mahi kawanatanga (Public Service).

Kotahi mea i mahue i au ara kei te akona nga tamariki katoa ki te korero Maori—he hawhe haora i nga ra katoa—kei ngaro to koutou reo rangatira i te mata o te whenua. He take nui tenei engari kaore au e watea ki te korero mo tenei take i naianei.